

YICH NELL DAN' BZOJ POSTL SAN JUAN

Di'll dan' nsa'a yel nban zejlikane

¹ Llyixjwe'to' re' ke be'nnen' nzi'i xti'll Dios, be'nnen' lloe' yel nban zejlikane ke be'nn llonlira'll Le'e. Ba zokze' kan' bxhe yellriote. Na' neto' Postl bzenayto' xti'llen, bre'toe' na' bdantoe'.

² Le'en gorje' radj be'nnach na' bre'toe', na'llen' lloe'to' xti'llen. Llyixjwe'to' re', Le'en be'nnen' nsa'a yel nban zejlikane, zorenkze' Xallo Diosen', na' ba broe'rawe' neto'.

³ Llyixjwe'to' re' ke be'nnen' bre'to'n, na' be'nnen' bzenayto' ken', nench na' gonrenre neto' txhen. Le ka nak neto' ba nakto' toze ren Xallo Diosen', ren Xhi'nne' Jesucristo na'.

⁴ Na'llen' llzojto' re' le' yich ni, nench na' sore yewere.

Diosen' nake' beni'

⁵ Neto' bzenayto' ka be'e Xanllon' di'lle, na' llyixjwe'to' re', Diosen' nake' beni', na' bibi da xchol de rawe'.

⁶ Na' cha' nnello llonllo txhen Diosen', na' llonkzillo da xhinnje, bi lloe'llo di'll li. Na' dan' llonllon' bi zejen to li.

⁷ Ka nak Diosen' nake' ka beni', na' cha' lli'o dallo rao beni' ke'en, na'llen' nakllo toze, na' yichjra'llda'ollon' yega'nnen yalle, le Xhi'nne' Jesucriston' brarj xchene'n nench na' bake'e yeolol da xhinnj benllo.

⁸ Cha' nnello bitbi do'l kello de, ziye'e kwinnlo, bi lloe'llo di'll li.

⁹ Zan cha' lli'o wxoaraplo rao Diosen', Le'e nake' be'nn li, be'nn cha'o, na' wazi'xhenkze' yeolol dan' llonllon', wnitrawe' yeolol da xhinnj kellon'.

¹⁰ Cha' nnello bitbi da xhinnj nonllo, llonllo Diosen' ka to be'nn wenra'le, le bi llejle'llo di'll li ke'e na'.

2

Llnnab Criston' gakrén Diosen' lli'o

¹ Re' nakre ka xhi'nna' da'o ak, llzoja' re' di'll ki nench na' bibi da xhinnj gonre. Na' cha' no gon da xhinnjen', zokze Jesucristo be'nnen' llon dan' zej lilla, na' llnnabe' yezi'xhen Xallo Diosen' kello.

² Jesucriston' brarj xchene'n ni ke lli'o llon da xhinnj nench bake'e xto'l-llon', na' ker ke balzllon' brarj xchene'n, ke yeololkze be'nn lla'a yellrion' brarje'n.

³ Na' cha' llonllo kan' ne Dios na', na'llen' wak nnello ba nombia'lloe'.

⁴ Na' cha' nello ba nombia'lloe', na' bi llonllo kan' ne'e na', ziye'zllon' cha' ka', na' bi nna cho' di'll li ke'en lo yichjra'llda'ollo.

⁵ Cha' llonllo kan' ne'e na', ba nllie'llo Diosen' kan' llaya'l llie'lloe'n. Na'llen' nnézello ba naklloe' txhen.

⁶ Na' noteze lli'o cha' nello nakllo txhen Diosen', llaya'l sollo gonllo ka da wen na' ben Jesucristo na'.

Da koben' nllia Diosen' bia'a gonllo

⁷ Re' be'nn nllie'ra', dan' llzoja' re' gonre ni, bi naken to da kobe. Naken to di'll da ba be'renkza' re' kan' bzoraore llonlira'llre Jesucristo na', le naken di'll dan' ba bénkzere.

⁸ Zan dan' llepa' re' gonre na', naksen ka to da kobe, le ba broe' Criston' re' naken da za'ke, na' lekze re' llroe're naken da za'ke. Ba bzoraolde ke yeolol da ka' llwie Diosen'. Na' ba bzoraolre'llo da wen na' llon Diosen', naken ka to beni' da llse ni'.

⁹ Noteze la'kze cha' nnello dallo rao beni' ke Diosen', na' llwie lwelljlo, nna ncholkze lo yichjra'llda'ollon'.

¹⁰ Noteze cha' nllie' lwelljlo, da li dallo rao beni' ke Diosen', billbi de da wlli'y lli'o rao da xhinnjen'.

¹¹ Na' cha' llwie lwelljlo, nchole lo ra'llda'ollon', kon to zejlo ka ga zeje to be'nnelchol, be'nn bi llre'e garen' cheje', le da xhinnj na' ba ncholen lo yichjra'llda'ollon'.

¹² Ganni llzoja' re' nakre ka xhi'nna' da'o, ka nak Dios na', ba bazi'xhenkze' keré dan' llonlira'llre Jesucriston'.

¹³ Ba bzoja' da ki ke re' be'nn gore, le ba nombia're Jesucriston' be'nnen' ba zokze kan' bxhe yellriote. Ba bzoja' da ki ke re' be'nn we'o llaban, le ba bzoere bi ben daxi'o re' gan.

Da yobre nia' re', ba bzoja' da ki ke re', nakre ka xhi'nna' da'o, le ba nombia're Xallo Diosen'.

¹⁴ Ba bzoja' da ki ke re' be'nn gore, le ba nombia're Jesucristo be'nnen' ba zokze ka bxhe yellriote. Leska' ba bzoja' da ki ke re' bi we'o llaban, le ngo' yichjre xti'll Diosen', na'llen' ba bzoere bi ben daxi'on re' gan.

15 Bi yewere da xhinnjen' de rao yellrion'. Cha' yewello da xhinnjen' de rao yellrion', zeje di'lle bi nllie'llo Xallo Diosen'.

16 Le yeolol da xhinnj da de rao yellrion', ka nak yel zera'll da xhinnjen' lle'ne xpe'rllon', na' da xhinnj ka' zera'll yejraollon', na' yel llaljen', ker ka da ka'n lle'ne Xallo Diosen' gonllo. Da kin' naksen da xhinnj da de rao yellrio ni.

17 Na' da te ke dan' de yellrio ni, na' dan' llzera'll be'nne bi llzenay ke Dios. Zan be'nnen' llon kon kan' ne Dios na', wbankze be'nnen' ke chnare.

Za za'a be'nn wlliaiyi'll Criston'

18 Re' nakre ka xhi'nna' da'o ak, ba rez llin lla yeyoll yellrio ni. Neto' ba bzéneto' re', wllin lla yed be'nn wlliaiyi'll Criston', le nna', be'nn zan ba za'k ll-liaiyi'll ake' Criston'. Ke len na' ba llroe'n ba zo rez llin lla yeyoll yellrio ni.

19 Radjllo nizen' blloj be'nn ka' blliaiyi'll Criston'. Le kere do ra'll ake'n benrén ake' lli'o txhen llon-lira'll-llo Criston'. Le chenak do ra'll ake' ben ake' txhen, nna zo akllé' llonrén ake' lli'o txhen chenake. Na' dan' ba balloj ake' na', nakbie'kze bi nak ake' be'nn llon lli'o txhen.

20 Zan ka nak re', Cristo na' ba benne' re' Spíritu ke Diosen', na'llen' yeolol-llo nnézello kan' ne di'll li ke Diosen'.

21 Llzoja' re' da ni, le ba nombia're di'll li ke Diosen', kere nnello bi nna gombia'ren na', na' leska' nnézkzere ni to di'll wenra'll bi ren di'll li ke'en.

22 ¿Noxha be'nn nak be'nn wenra'lle? Be'nn wenra'llen' nak be'nnen' nne'e kere Diosen' bse'l Jesúsén', be'nnen' nak Cristo nench nnebie'.

Be'nnen' ne ka' llwiere' Criston', na' llzoe' Xallo Diosen' chla're ren Xhi'nne' Cristo na'.

²³ Na' no be'nne lloe' di'llen' nne'e notno Jesucristo bse'l Diosen', le'en bi zerén Xallo Diosen' le'e. Na' be'nnen' lloe' di'll nne'e Dios na' bse'le' Jesucriston', zorenkze Xallo Diosen' le'e.

²⁴ Na' ka nak re', lesó lewzenay ka da ka' ba bzéneto're', kan' bzoraore llonlira'llre Cristo na'te. Na' cha' wzoatezre di'll ke'en, na' ka' sorenkze Xallo Diosen' re' ren Xhi'nne' Cristo na'.

²⁵ Na' Jesucriston', dan' ba bne'e gonne' na', gonne' yel nban zejlikane kello.

²⁶ Ba bzoja' re' da ni, ba bia'a di'll ke be'nn ka' lle'ne siye'e re'.

²⁷ Jesucriston' ba benne' Spíritu ke Diosen' cho'n lo ra'llda'oren', wzejnie're'n re' yeolol dan' llaya'l chejnie're na'. Na' ka nak Spíritu ke Diosen' lloe'n di'll li, bi ziye'n. Na' dan' zorenen re' llzejnie're'n re', na' bill yálljere no wzejnie' re' bi da ka' nak da li. Ke len na' lewzenay dan' bzejnie' Spíritun' re', na' lesorenteze Jesucriston'.

²⁸ Na' nna' xhi'nna' da'o, llaya'l sotezlllo wzoallo xti'll Criston' nench bi lleblloe' katen' yede' da yobre, na' bi si'lllo zdo' katen' re'llo ba bre'en.

²⁹ Na' ba nnézello Xanllo Diosen' zeje' llone' kan' llaya'l gone'n, leska' llaya'l nnézello cha' zejlllo llonllo kan' llaya'l gonllo na', nakslllo xhi'nn Dios.

3

Akren' gonllo cha' nakllo xhi'nn Dios

¹ Legakbe'e kan' nllie' Xallo Diosen' lli'o dan' ne'e nakllo xhi'nne'. Na' ka nak be'nn ka' bi

llonlira'lle Diosen', bi llayombia' akre' lli'o, le bi nombie' akre' Diosen'.

² Bi'cha' da'o ak nllie'ra', ba nakllo xhi'nn Dios, na' bi nna wroe'n akren' gakklo. Zan nnézello katen' yed Jesucriston' da yobre, kana'n re'lloe' akren' nake' na', na' yeyak yichjra'llda'ollon' kan' nak yichjra'llda'we' na'.

³ Na' yeololte be'nn ze bexhe' baten' yede' da yobren', llaralre' llayib lo yichjra'llda'we'n nench yeyaken yalle, kan' nak ra'llda'o Jesucriston' naken yalle.

⁴ Noteze be'nne zoe' llone' da xhinnje, bi llone' kan' ne Diosen' gonllo, le kat llonllo da xhinnjen', llyichjlllo dan' nllia Diosen' bia'a gonllo na'.

⁵ Nnézkzello bed Jesucriston' yellrio ni nench yeke'e xto'l lli'o be'nnach, na' ka nak Le'e, bibi da xhinnj none'.

⁶ Na' cha' lli'o llzoatezlllo xti'le'n, bibi da xhinnj llonllo, zan cha' lli'o zokzlllo llonllo da xhinnjen', bi llejle'llo ke'e, bi nna gombia'lloe'n cha' ka' llonllo.

⁷ Xhi'nna' da'o, bi we're latje no siye'e re'. Cha' llonllo da wen kan' llaya'l gonllo na', zejzkzlllo lilla kan' zej Xanllo na'.

⁸ Na' cha' zollo llonllo da xhinnje, nakslllo xhi'nn daxi'o, le daxi'o na'n zokzen llonen da xhinnj ka bxhe yellriote. Ke len na' bed Xhi'nn Diosen' yellrio ni nench wchochj wlane' dan' llon daxi'on.

⁹ Cha' norllo ba non Diosen' lli'o ka xhi'nne', bill llaya'l gonllo da xhinnj, le ba bakobe' yichjra'llda'ollon', na' bill gonllo da xhinnjen', le ba nakllo xhi'nn Dios.

10 Na' gannin' llroe'n noxhan' nake xhi'nn Diosen', na' noxhan' nake xhi'nn daxi'on: cha' noteze be'nne bi zoe' llone' da wen, na' bi nllie're' be'nn lwellje', bi nake' xhi'nn Dios chet ka'.

Llaya'l llie' lwelljlo

11 Ba bénkzello da ni kan' bzoraollo llonlira'll-llo Jesucristo na': llaya'l llie' lwelljlo.

12 Bi gakklo kan' gok da Caín, goke' txhen daxi'on bayot bi'che'n. ¿Nnézere bixchen bete' le'e? Yel be'nn wen da xhinnj ke'e na'n bene' ka', na' be'nn bi'che' na' bzoe' bene' da wen.

13 Na' bi yebánere, be'nne bi'che, kate be'nn ka' bi llonlira'lle Diosen' wie akre' re'.

14 Nnézkzello bill llnebia' yel goten' lli'o, na' ba de yel nban zejlikane kello, le ni'tllo nllie' lwelljlo. Zan be'nnen' bi nllie' lwellje', ba llnebia' yel goten' le'e.

15 Noteze be'nne cha' llwie lwellje', nakse' be'nn wen xhia rao Dios. Na' nnézkzello be'nn wen xhia ka', cha' bi wayat akre' ke da xhinnj ke ake'n, bi de yel nban zejlikane ke ake'.

16 Jesucriston' bzanre' yel nban ke'en ni ke dan' nllie're' lli'on, ke len na' llaya'l nnézello kan' gon lli'o, zane yel nban kellon' ni ke be'nn lwelljlo.

17 Na' cha' bi da de kello, na' nnézello be'nn lwelljlon' yalljre'n, cha' lli'o bi llaya'chra'll-loe', bi gak nnello: “Nllie'ra' Diosen'.”

18 Xhi'nna' da'o ak, bi llie' lwelljlo de di'llze. Llaya'l llie' lwelljlo do yichj do ra'll-llo, na' sollo wia lwelljlo.

19 Cha' llonllo kan' bnia' na', nnézello llonllo txhen Dios be'nnen' lloe' di'll li na', na' gakbe'llo lo yichjra'llda'ollo ni'tllo wen rao Dios.

20 Na' cha' llákello lo yichjra'llda'ollo nakllo be'nn wen da xhinnj rao Diosen', Diosen' za'klle' kerke yichjra'llda'ollo, na' Le'en nnezre' yeololte.

21 Kan' naken be'nn bi'cha' nllie'ra', cha' llakbe'e lo ra'llda'ollon' bibi do'l kello de, bi de lleblllo Diosen'.

22 Na' Le'en gone' biteze da nnábelloe', le llzoallo di'll bia'a ke'en dan' ne'e gonllo na', na' llonllo kan' llazra'lle' na'.

23 Na' da ni nllia Diosen' bia'a gonllo, gonlira'llllo Xhi'ne' Jesucriston' do yichj do ra'll-llo, na' llie' lwelljlllo, kon kan' nak di'll bia'a ke'e na'.

24 Na' cha' llonllo kan' nak di'll bia'a ke'e na', zerenkzlllo Diosen', na' Dios na' zerenkze' lli'o. Na' kin' nnézello Diosen' zerene' lli'o: ka nak Spíritu ke'en ba benne'n yo'n lo ra'llda'ollo.

4

Spíritu ke Diosen' na' ren dan' llwie Criston'

1 Re' bi'cha' nllie'ra', bi chejle're cha' no be'nn ne ake' lloe' ake' di'll da goll Spíritu ke Dios leake'. Zga'tek lewiá cha' naken di'll da bzejnie' Dios o cha' bi naken ka'. Lewiá, le ba ll-llach be'nn zan be'nn ziyee ne ake' lloe' ake' di'll da goll Diosen' leake'.

2 Na' ki gak nnézello cha' da lin' bzejnie' Spíritu ke Diosen' leake' ka di'llen' lloe' ake'n: yeolol be'nn we'e di'll ne ake' Jesucriston' nake' be'nn bse'l Dios, na' gorje' radj be'nnach, nnézello yo' Spíritu ke Diosen' lo yichjra'llda'we' na'.

3 Na' be'nn ka' lloe' di'll ne ake' Jesucriston' bi nake' be'nn bse'l Diosen', bibi Spíritu ke Dios yo' yichjra'llda'o be'nn ka'. Be'nnen' ne ka' lloe'

di'll da ll-lliayi'll Criston'. Ba bénere yed da wie Criston'. Na' nna' ba bra'n ba llwieren Le'e.

⁴ Xhi'nna' da'o ak, ba nakre Diosen' txhen, ba benre gan rao be'nn wenra'll ka', le Diosen' zorén re', naklle' be'nn yel wak kerke dan' zo ren be'nn ka' lla'a yellrion'.

⁵ Be'nn ka' bi llzoa xti'll Diosen' lloe'rén ake' be'nn ak di'll ke da llak yellrio, na' llawé be'nn ka' lla'a rao yellrio ni, llzenay ake' ke ake'.

⁶ Ka nak lli'o, ba nakllo Diosen' txhen, na'llen' yezikre be'nn nombia' Diosen', llzenay ake' di'll ka' lloe'rén akllloe'n, na' be'nn ka' bi nak be'nn ke Dios, bi llzenay ake' di'll kellon'. Na'llen' nnézello non' yo' Spíritu ke Diosen' llzejnie'n le'e di'll li, na' non' yo' spíritu da lloe' di'll wenra'll.

Diosen' nllie're' be'nnach

⁷ Re' nakre be'nn nllie'ra', llaya'l nni'tllo llie' lwelljlo, le Dios na'n zokze llone' nench nllie' lwelljlo. Na' be'nnen' nllie' lwellje' nakbie' nake' xhi'nn Dios, na' nombie're' Diosen'.

⁸ Be'nnen' bi nllie' lwellje' bi nnezre' kan' nak Diosen', le ba nnézello Diosen' nake' be'nn nllie'.

⁹ Ka'n ben Diosen' broe're' kan' nllie're' lli'o, bse'le' Xhi'nne'n yellrio ni nench banllo ke chnare, cha' lli'o gonlira'll-lloe'.

¹⁰ Ki nak yel nllie' dogarje: Bi nnello lli'on bllie'llo Diosen', Lere'n bllie're' lli'o, na'llen' bse'le' Xhi'nne' Jesucriston' nench brarje' xchene' ni ke lli'o llon da xhinnj nench bake'e xto'l-llon'.

¹¹ Re' be'nn nllie'ra', dan' nllie' Diosen' lli'o, leze ka'kzen' gon lli'o llie' lwelljlo.

12 Ni to be'nne bi nna re're' Diosen'. Zan cha' lli'o nni'tllo llie' lwelljlllo, nakbie' zorenkze Diosen' lli'o, na' nllie'lloe' kan' llaya'l llie'lloe' na'.

13 Nnézello zerenllo Diosen', na' ka' zerén Le'en lli'o, dan' ba bse'le' Spíritu ke'en zon lo ra'lda'ollo na'.

14 Na' neto' ba bre'to', na'llen' lloe'to' di'll nnézeto' bse'l Xallo Diosen' Xhi'nne'n nench yesre'e be'nnach rao da xhinnjen'.

15 Na' cha' lli'o llejle'llo, na' lloe'llo di'll nello Jesucriston' nake' Xhi'nn Dios, Diosen' zorenkze' lli'o, leska' lli'o zerenllo Diosen'.

16 Na' ka' nak lli'o ba nnézello, na' llejle'llo nllie' Diosen' lli'o. Diosen' zokze' nllie're' be'nnach, le ka'n nak yichjra'lda'we'. Na' cha' zollo nllie' lwelljlllo, na'llen' zerenllo Diosen', na' Le'e zerene' lli'o.

17 Dios na' zokze' llakrene' lli'o nench llie' lwelljlllo kan' llaya'l llie' lwelljlllo na', ka'n llon Diosen' nench ke lleblloe' kate llin lla gone' yel koxchis ke yeolol be'nnach. Le lli'o lla'llo rao yellrio ni, nllie' lwelljlllo kan' llon Jesucristo na'.

18 Cha' nllie'llo Diosen' kan' llaya'le, bibi de llebllo. Yel nllie' dogarje llaka'n yel lleben' ka'le. Cha' llebllo, naksen da llsa'kzi' lli'o chet ka', na' cha' nna llebllo, llroe'n bi nna llie'llo Diosen' kan' llaya'l llie'lloe' na'.

19 Lli'o nllie'llo Diosen', le zga'tek Le'en bllie're' lli'o.

20 Na' cha' norllo nello: “Nada' nllie'ra' Dios”, na' llwie lwelljlllo, da na'n naken da wenra'lle. ¿Akre gonllo llie'llo Diosen' be'nn bi llre'llo, cha' bi nllie' lwelljlllo be'nn llre'tello?

²¹ Na' ba bllie' bia'a kan' llaya'l gonllon': cha' nllie'llo Le'e, leska' llaya'l llie' lwelljlo.

5

Wkwasllo da xhinnjen' ka'le

¹ Cha' lli'o llejle'llo Jesucriston' nake' be'nne bse'l Dios, nakslllo xhi'nn Dios. Na' cha' nllie'llo Xallo Diosen', ka'kzen' llaya'l llie' lwelljlo, le be'nn lwelljllon' xhi'nn Dioskzen'.

² Kate zollo nllie'llo Diosen', na' llonllo kan' ne di'll bia'a ke'e na', na'llen' nnézello leska' nllie'llo yezikre be'nn ka' nak xhi'nn Dios.

³ Cha' nllie'llo Diosen', llonllo kan' ne di'll bia'a ke'e na'. Na' di'll bia'a ke'e na', bi naken da bni' gonllon.

⁴ Yeolol be'nn ba nak xhi'nn Diosen', zoe akre' llkwas ake' da xhinnjen' de yellrion' ka'le. Na' dan' nxenra'll-llo Jesucristo na'n, zoello llkwasllo da xhinnjen' ka'le, na' bill llonllon.

⁵ Nollre no llzoe wkwase da xhinnjen' de yellrio ni ka'le, le zeraoze be'nnen' llejle' ke Jesús be'nnen' nake' dogarj Xhi'nn Dios, leake'n llzoe akre' llkwas ake' da xhinnjen' ka'le.

Diosen' lloe' di'll ke Jesucriston' nake' Xhi'nn Dios

⁶ Kin' ben Jesucriston' chak bede' yellrio ni, blloe' nis na' brarj xchene'. Kere nello to nis na'zen' blloe', rente xchene' na'n brarjrene'. Ka'n ne Spíritu ke Diosen', le Spíritu na' lloe'n di'll li.

⁷ Na' zjani't chonn be'nne llgo' da li yebán', lloe' ake' di'll ke Jesucriston': Xallo Diosen', ren be'nnen' nzi'i Xti'll Dios, na' ren Spíritu ke Dios na'. Na' be'nn chonn ki, tozen' nak akse'.

⁸ Leska' chonn da ligo' da li rao yellrio ni ke Jesucriston': Spíritu ke Dios na', na' dan' gok kan' blloe' nis, na' dan' gok kan' brarj xchene' na'. Na' yonnte da ki goken toz ka lloe' ake'n di'lle.

⁹ Le chet ka' llejle'llo xti'll be'nnachen', za'ktelle xti'll Diosen' si'llon, le Diosen' ba be'e di'll ke Xhi'nne' Jesucriston'.

¹⁰ Na' cha' llejle'llo nak Jesucriston' Xhi'nn Dios, zokze xti'll Xanllo Diosen' lo ra'llda'ollo. Na' cha' lli'o bi llejle'llo ke Diosen', na' llonlloe' ka to be'nn wenra'lle dan' bi llejle'llo di'll dan' lloe' ke Xhi'nne' na'.

¹¹ Xti'll Dios na'n llzejnie' lli'o wa't yel nban zejlikane ke be'nnachen' cha' gonlira'll ake' Xhi'nne' Jesucriston'.

¹² Kin' naken cha' lli'o llonlira'll-llo Jesucriston', dekze yel nban zejlikane kello. Na' cha' bi llonlira'll-lloe', bibi yel nban zejlikane de kello.

Kan' bayoll bzoj postl San Juan be'nn ka'

¹³ Llzoja' re' di'll ki, re' llejle're Jesucriston' nake' Xhi'nn Diosen', nench nnézere de yel nban zejlikane keré.

¹⁴ Na' bi llebllo llalwill-llo Diosen', le nnézello zie' xti'll-lon' kate llnnablllo rawe'n da llazra'lle'.

¹⁵ Na' kate nnézello zie' xti'll-lon' biteze da llnnábelloe', na' nnézello gonne' da ka' ba bnnablllo na'.

¹⁶ Cha' llwiallo be'nn llwelljlllo llone' da xhinnj da bi lljasán le'e rao yel got ke chnare, llaya'le nnablllo rao Diosen' gakrene' le'e nench yezoe' wen rao Diosen' da yobre, kon cha' naken da xhinnj da bi lljasán le'e rao yel got ke chnare. Le de yel got ga

kweyie' ke chnare. Len bi naken zi nnia' nnabre gakerén Diosen' leake'.

¹⁷ Cha' llonllo biteze da xhinnj napkzlllo do'le, zan kere yeolol da xhinnjen' llonllo na'n wsa'n lli'o rao yel goten'.

¹⁸ Nnézello cha' ba bacha'a Xallo Diosen' yichjra'llda'ollon', bill sollo gonllo da xhinnjen', le zo be'nnen' nake Xhi'nn Diosen', llkwase' lli'o rao daxi'on, ke len na' bi zoen wleyi'n lli'on.

¹⁹ Nnézello zerén Dios lli'o, na' be'nn ka' bi llzoa xti'lle'n, daxi'on llnebia'kzen leake'.

²⁰ Nnézello ba bed Xhi'nn Diosen', na' badze-jnie're' lli'o nench bembia'llo Xe'en, be'nnen' nake dogarje Dios. Na' ni'tllo toze ren be'nnen' nake dogarje Dios, na' nakllo toze ren Xhi'nne' Jesu-criston'. Le'en nake' dogarje Dios, na' llonne' yel nban zejlikane ke be'nne llonlira'll Le'e.

²¹ Xhi'nna' da'o ak, lewiá ke wxenra'llrizre lwa'a lsa'k ka'. Ka'n gakchga.

**Di'Il dan' nsa'a yel nban (El Nuevo
Testamento en el Zapoteco de Yalálag)
New Testament in Zapotec, Yalálag (MX:zpu:Zapotec,
Yalálag)**

copyright © 2000 Wycliffe Bible Translators, Inc.

Language: Zapotec, Yalálag

Translation by: Wycliffe Bible Translators, Inc.

Zapoteco, Yalalag [zpu], Mexico

Copyright Information

© 2000, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yalálag

© 2000, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d8abdc19-7872-5010-9ef1-465148ed0f0c